

**Мѣсяца Іаннуарія во 8-й дѣнь.  
СЛУЖБА СВЯТОМУ СВЯЩЕННОМУЧЕНИКУ  
ИСИДОРУ И ИЖЕ СЪ НИМЪ СЕДМИДЕСЯТИ  
И ДВУМЪ МУЧЕНИКОМЪ, ВО ЮРЬЕВЪ,  
ГРАДЪ ЛИВОНСТЪМЪ, ЗА ПРАВОСЛАВІЕ  
ПОСТРАДАВШИМЪ.**

**(СПб.: Синодальная Типографія, 1897).  
НА ВЕЛИЦЪЙ ВЕЧЕРНИ,**

**Блаженъ мужъ.., 1-й антифонъ. На Господи  
воззвахъ: стихиры на 8: праздника 3 и мучениковъ 5.**

**[Стихиры праздника, гласъ 2:**



Просвѣтителя нашего, просвѣщающаго всякаго челоувѣка, видѣвъ Предтеча, креститися пришедша, радуется душею и трепещетъ, рукою показуеть Его, и глаголетъ людемъ: Сей, избавляй Израїля, свобождай насъ отъ ислѣбнїя. О, безгрѣшный Христѣ Боже нашъ, слава Тебѣ!

Избавителю нашему, отъ раба крещаему и Духа пришестьемъ свидѣтельствуему, ужасошася, зряще, ангельская воинства. Гласъ же съ небесѣ принесѣся отъ Отца: Сей, Егоже Предтеча рукою крещаетъ, Сынъ Мой естъ возлюбленный, о Немже благоволихъ. Христѣ Боже нашъ, слава Тебѣ!

Иорданскія струи Тебѣ, Источника, прїяша, и Утѣшитель въ видѣ голубинѣ схождаше: приклоняетъ верхъ Приклонивый небеса. Зоветь и вопіетъ брѣние Зиждителю: что ми повелѣваеши, яже выше мене? Азь требую Твоего крещенія. О, безгрѣшный Христѣ Боже нашъ, слава Тебѣ!]

## Стихиры мучениковъ, глась 8, самогласень:

**Ч**то́ васъ наречёмъ, святїи, яко дѣмоновъ полки́ сокруши́сте и стрѣлы ихъ притупи́сте крѣпкимъ своимъ страда́ніемъ отъ мучителей? Вы́ бо небоязненно сто́ясте за Правосла́вную вѣру Христо́ву, за ню́же тѣлеса́ своя́ на му́ки му́жески отда́сте, святїи мученицы, се́дмьдесяте со двѣма́, и со учи́телемъ своимъ Исидоромъ, и страда́ніемъ своимъ, честнїи, святу́ю Це́рковь Христо́ву возвесели́сте; на́съ же, недугующихъ грѣхми́, изцѣлите, мученицы божѣственнїи, яко иму́щии дерзнове́ніе ко Го́споду, отъ раба́ креще́ніе при́имшему. **[Два́жды.]**

**Ч**то́ тя́ имену́емъ, священниче доблїи́ Исидоре? Ты́ бо привѣлъ еси́ Христо́ви полкъ́ мученикъ, и съ ни́ми просла́вилъ еси́ праву́ю оте́ческую вѣру предъ суемудры́ми лати́ны, и странная́ ученїя́ и льсти́вая увѣщанїя́ ихъ отве́рглъ еси́ си́лою Христа́, креще́ніемъ во Иорда́нѣ главы́ змїевъ сокруши́вшаго, Иже и да спасе́тъ на́съ и очисти́тъ грѣховъ на́шихъ мно́жество, Свои́х мученикъ мо́льбами, яко Ще́дръ и Человѣколюбе́ць. **[Два́жды.]**

**Ч**то́ васъ наречёмъ, святїи добропобѣднїи мученицы Христо́вы со священнымъ учи́телемъ ва́шимъ Исидоромъ? Вы́ бо, зако́нь Господень непоро́чно сохра́ньше, благоче́стная христі́анская служенїя́ соблюдо́сте и гордыхъ мучителей посрами́сте си́лою во Иорда́нѣ крестивша́гося Христа́ Спа́са на́шего. Егоче́ моли́те, мученицы Господни́, изба́витися на́мъ тмы́ кромѣшны́я и огня́ ге́енскаго и спасти́ся душа́мъ на́шимъ.

## Слава, глась 5:

**Р**а́дуйся, священниче Бо́жїи Исидоре, доблїи́ тайнамъ Христо́вымъ служите́лю: единоревни́тельный собо́ръ седми́десять со двѣма́ имы́и съ собо́ю, яко звѣзда́ пресвѣ́тлая,

на твёрди церковнѣй возсіяль еси́ и Троицу Единосу́щную и Нераздѣльную, Отца́, Сы́на и Ду́ха Свята́го, отъ Отца́ исходя́щаго, я́сно проповѣдалъ еси́ предъ враждебнымъ би́скупомъ и мно́гимъ наро́домъ, обличая лати́нскую вѣру. Сего́ ра́ди и тѣлеса́ ва́ша свята́я, му́ченицы Христо́вы, предана́ бы́ша быстри́намъ рѣ́чнымъ и па́ки изнесена́ бы́ша Бо́жиимъ про́мысломъ на су́шу, ду́хи же ва́ша Христо́сь упоко́и во оби́телехъ небесныхъ. И ны́нѣ, святіи му́ченицы, за Правосла́вную вѣру умерши́и, моли́теся Христу́ Бо́гу спасти́ся душа́мъ на́шимъ.

### **И ны́нѣ праздника, гла́сь 2:**

[Приклоні́ль еси́ главу́ Предте́чи, сокруши́ль еси́ главы́ зміевъ. Прише́дь въ струи́, просвѣти́ль еси́ вся́ческая, е́же сла́вити Тя, Спа́се, Просвѣ́тителя ду́шъ на́шихъ.]

### **Вхо́дь. Прокі́мень дне́. Парі́мии святы́мъ. Проро́чества Исаі́ина чтене́е. [Глава́ 43.]**

Та́ко глаго́летъ Госпо́дь: вси́ язы́цы собра́шася вку́пѣ, и соберу́тся кня́зи отъ ни́хъ, кто́ возвѣсти́тъ сія́ въ ни́хъ? Или́ я́же отъ нача́ла, кто́ слы́шана сотвори́тъ ва́мъ? Да приведу́тъ свидѣ́тели своя́ и оправда́тся, и да услы́шатъ, и да реку́тъ и́стину. Буди́те Ми́ свидѣ́тели, и Азь Свидѣ́тель, глаго́летъ Госпо́дь Бо́гъ, и отрокъ, его́же избра́хъ, да позна́ете и вѣруете Ми́, и разумѣ́ете, я́ко Азь е́смь; пре́жде Мене́ не бы́сть и́нъ бо́гъ, и по Мнѣ́ не бу́детъ. Азь е́смь Бо́гъ, и нѣ́сть развѣ́ Мене́ спаса́яй. Азь возвѣсти́хъ и спаса́хъ, уничижи́хъ, и не бѣ́ въ ва́сь чу́ждій. Вы́ Мнѣ́ свидѣ́тели, и Азь Госпо́дь Бо́гъ. И е́ще отъ нача́ла Азь е́смь, и нѣ́сть отъ ру́къ Мои́хъ изба́вляяй; сотворю́, и кто́ отврати́тъ то? Си́це глаго́летъ Госпо́дь Бо́гъ, изба́вляяй ва́сь Святы́й Израі́левъ.

### **Прему́дрости Соломо́ни чтене́е. [Глава́ 3.]**

**П**раведныхъ души въ руцѣ Божіей, и не прикоснется ихъ мука. Непщевани быша во очесѣхъ безумныхъ умерети, и вмѣнися озлобленіе исходъ ихъ, и еже отъ насъ шествіе сокрушеніе; они же суть въ мирѣ. Ибо предъ лицемъ чловѣческимъ аще и муку приимуть, упованіе ихъ безсмертія исполнено. И в малѣ наказани бывше, великими благодѣтельствовани будутъ, яко Богъ искуси я и обрѣте ихъ достойны Себѣ. Яко злато въ горнилѣ, искуси ихъ и, яко всеплодіе жертвенное, пріятъ я. И во время посѣщенія ихъ возсіяютъ и, яко искры по стѣблию, потекутъ: судятъ языкомъ и обладають людьми, и воцарится Господъ въ нихъ во вѣки. Надѣющіися Нанъ разумѣютъ истину и вѣрни въ любви пребудутъ Ему, яко благодать и милость въ преподобныхъ Его и посѣщеніе во избранныхъ Его.

### **Премудрости Соломона чтеніе. [Глава 5.]**

**П**раведницы во вѣки живутъ, и въ Господѣ мзда ихъ, и попеченіе ихъ у Вышняго. Сего ради приимуть царствіе благолѣпія и вѣнецъ доброты отъ руки Господни, зане десницею покрыетъ я и мышцею защититъ ихъ. Прииметъ всеоружіе — рвеніе свое и вооружитъ тварь въ мѣсть врагомъ. облечется въ броня правды и возложитъ шлемъ — судъ нелицемѣренъ. Прииметъ щитъ непобѣдимый — преподобіе, поостритъ же напрасный гнѣвъ — во оружіе, споборетъ же съ нимъ мѣръ на безумныя. Пойдутъ праволучныя стрѣлы молніины и, яко отъ благокругла лука облаковъ, на намѣреніе полетятъ, и отъ каменомѣтныя ярости исполнь падутъ грады. Вознегодуетъ на нихъ вода морская, рѣки же потопятъ я нагло. Спротивъ станеть имъ духъ силы и, яко вихоръ, развѣетъ ихъ, и опустошитъ всю зѣмлю беззаконіе, и злодѣйство превратитъ престо́лы сильныхъ. Слышите убо, царіе, и разумѣйте, навѣкните, судіи концевъ земли. Внушите держаціи

мно́жества и гордя́щися о наро́дѣхъ язы́ковъ, ꙗ́ко дана́ е́сть отъ Го́спода держа́ва ва́мъ и си́ла отъ Вы́шняго.

#### **На литіи стихиры праж́дника, гла́сь 4, самогласны:**

[Одѣва́йся свѣ́томъ, ꙗ́ко ри́зою, на́сь ра́ди по на́мъ бы́ти сподо́бился е́сть, во струи́ одѣва́ется днесь Іорда́нскія, не Са́мъ си́хъ ко очище́нію тре́буя, но на́мъ Со́бою устро́яй порождѣ́ніе. О, чудесе! Безъ огня́ изваря́етъ, и назидаетъ безъ сокруше́нія, и спаса́етъ въ Него́ просвѣща́емыя Христо́сь Бо́гъ и Спа́сь ду́шъ на́шихъ.

**Тебе́,** въ Ду́сѣ и огни́ очища́юща грѣ́хъ мі́ра, зря́ Крестите́ль гряду́ща къ себѣ́, ужа́саяся и трепе́ща, вопія́ше, глаго́ля: не смѣ́ю держа́ти ве́рхъ Тво́й пречи́стый, Ты́ мя освяти́, Влады́ко, Божество́ннымъ явле́ніемъ Твои́мъ, Еди́не Человѣ́колю́бче.

**Прииди́те,** подража́имъ му́дрыя дѣ́вы, прииди́те, сря́щимъ я́вльшагося Влады́ку, ꙗ́ко при́иде, ꙗ́ко Жени́хъ, ко Іоа́нну. Іорда́нъ, видѣ́въ Тя, убо́яся и пожда́. Іоа́ннъ вопія́ше: не смѣ́ю держа́ти верха́ Безсме́ртнаго. Ду́хъ низхожда́ше въ видѣ́ голуби́нѣ освяти́ти во́ды, и гла́сь съ небесе́: Се́й е́сть Сы́нъ Мой́, прише́дый въ ми́ръ спасти́ родъ челове́чскій, Го́споди, сла́ва Тебѣ́.

**Крещает́ся** Христо́сь и восхо́дитъ отъ во́ды, совозво́дитъ бо съ Со́бою ми́ръ и зри́тъ разводя́щаяся небеса́, ꙗ́же Ада́мъ затвори́ себѣ́ и су́щимъ съ ни́мъ, и Ду́хъ свидѣ́тельствуе́тъ Божество́, Подобно́му бо предти́четъ и гла́сь отъ небесе́: отту́ду бо свидѣ́тельствуемый, Спа́сь ду́шъ на́шихъ.

**Трепета́ше** рука́ Крестите́лева, егда́ пречи́стому Твоему́ верху́ косну́ся; возврати́ся Іорда́нъ рѣ́ка вспя́ть, не дерза́я служи́ти Тебѣ́. Я́же бо устыдѣ́ся Иису́са Нави́на, ка́ко Творца́ своего́ устраши́тися не имя́ше? Но все́ испо́лниль еси́

смотрѣніе, Спа́се нашъ, да спасе́ши міръ явлѣніемъ Твоимъ, Еди́не Человѣколюбче.]

### **Слава, гла́сь 2:**

**Приидите**, мучениколюбцы, насладимся мы́сленно духо́вныя днесь трапѣзы, ю́же на́мъ предложи́ша тріе и се́дмьдесятъ му́ченицы Господни; вы́ же, страсотѣрпцы Христо́вы, со а́нгелы ду́хомъ водворяюще́ся, просите Христа́ Спа́са дарова́ти грѣховъ оставле́ніе на́мъ, ва́шу честную́ па́мьять соверша́ющимъ вѣ́рно.

### **И ны́нѣ праздни́ка, гла́сь 8:**

[Днесь вся́ка тва́рь просвѣща́ется, днесь вся́ческая веселя́тся, небѣсная вку́пѣ и земна́я, а́нгели и челове́цы смѣша́ются, идѣ́же бо Царе́во пришѣ́ствіе, и чи́нь прихо́дитъ. Теце́мъ у́бо на Иорда́нъ и ви́димъ вси́ Иоа́нна: ка́ко крещаетъ Ве́рхъ Нерукотворѣ́нный и Безгрѣ́шный? Тѣ́мже, апо́стольскій гла́сь припѣва́юще, согла́сно возопіе́мъ: яви́ся благода́ть Бо́жія спаси́тельная всѣ́мъ челове́комъ, озаря́ющи и подаю́щи вѣ́рнымъ ве́лію ми́лость.]

**На стихо́внѣ стихи́ры святы́мъ, гла́сь 4. Подобенъ: Яко**  
добля въ му́ченицѣхъ.

**М**ногообра́зными пре́щении гнѣ́бный мучи́тель угрожа́ше ка́знемъ злы́мъ преда́ти тѣ́леса́ ва́ша, богомы́сленнии му́ченицы, вы́ же не отверго́стеся Правосла́вныя Христо́вы вѣ́ры, но претерпѣ́ли есте́ темни́чная страда́нія и восприя́ли есте́ го́рькую сме́рть, ожида́юще бу́дущаго воздая́нія и безсме́ртныя сла́вы.

**Сти́хъ: В**оззва́ша пра́веднии, и Госпо́дь услы́ша ихъ, [и отъ всѣ́хъ скорбе́й ихъ изба́ви ихъ].

**Ч**удніи, божественніи, премудріи страсотерпцы пѣсньми священными да почтутся, Православіе бо предъ врагїи священно проповѣдавше, нечестивую угасиша лѣсть своими страданіи и славу пріяша неувядаемую.

**Стихъ:** Многи скорби праведнымъ, и отъ всѣхъ ихъ избавить я Господь.

**М**учителя беззаконна, беззаконно повелѣвающаго исповѣдати неправую вѣру, блаженніи мудріи, посрамисте, мученицы великоименїти, и, пострадавше терпѣливо, вѣнцы исплетосте побѣдныя, о мирѣ молящися.

### **Слава, гласъ 4, самогласень:**

**Н**есытною ко Христу любовію дышуще, Православія не отвергостеся, святїи мученицы, седмьдесяте со двѣма, и со учителемъ вашимъ, священнымъ Исидоромъ, и различныя обиды и поношенїя претерпѣсте, о Христѣ укрѣпляеми, и мучителей дерзость низложисте, святїи, и, непреклонно вѣру Христоу сохраняше, на небеса преставистеся ко всѣхъ Творцу, за Негоже и пострадасте. Тѣмже, дерзновеніе имуще къ Нему, просите даровати душамъ нашимъ миръ и велию милость.

### **И нынѣ праздника, гласъ 6:**

[Днесь всяка тварь просвѣщается, днесь всяческая веселятся, небесная вкупѣ и земная, ангели и человецы смѣшаются, идѣже бо Царєво пришествіе, и чинъ приходитъ. Тецемъ убо на Иордань и видимъ вси Іоанна: како крещаетъ Вѣрхъ Нерукотворенный и Безгрѣшный? Тѣмже, апостольскїи гласъ припѣвающе, согласно возопіемъ: явися благодать Божїя спасительная всѣмъ человекомъ, озаряючи и подаючи вѣрнымъ велию милость.]

### **Тропарь, гласъ 2:**

**С**тратотерпцы Господни блаженни, Православную вѣру Христову со дерзновениемъ проповѣдасте и на судищи учения враговъ неправая обличисте, того ради и ввержени бысте, святїи, во глубину рѣчную, души же ва́ша всели́шася въ небесныя кро́вы, идѣ́же со святы́ми предстоя́ще престолу Царя́ всѣ́хъ Бо́га, моли́тесь Ему́ за Благовѣрнаго Императора на́шего и за вся́ правосла́вныя лю́ди, по́двиги ва́ша че́стно почита́ющія.

### **Сла́ва, и ны́нѣ, пра́здника:**

[**В**о Иорда́нѣ креща́ющуся Тебѣ́, Го́споди, Тро́ическое яви́ся поклонѣ́ние: Родите́левъ бо гла́сь свидѣ́тельствова́ше Тебѣ́, возлю́бленнаго Тя́ Сы́на имѣ́ннѹя, и Ду́хъ въ ви́дѣ́ голуби́нѣ́ извѣ́ствова́ше словесе́ утвержде́ние. Явле́йся Христе́ Бо́же и ми́ръ просвѣ́щей, сла́ва Тебѣ́.]



### **НА УТРЕНИ,**

**На Бо́гъ Господь: Тропа́рь пра́здника, два́жды. Сла́ва, му́чениковъ. И ны́нѣ, пра́здника.**

**По 1-й стихоло́гии сѣда́лень, гла́сь 4. Подобе́нь: Яви́ся дне́сь.**

**Ч**естную́ тве́рдь церко́вную, я́ко звѣ́зды вели́кія, просвѣ́щаете при́сно и вѣ́рныя озаря́ете, му́ченицы боже́ственни, Христо́вы во́ини. [**Два́жды.**]

**Сла́ва, и ны́нѣ, пра́здника, [гла́сь 3. Подобе́нь: Краси́вѣ.**

**Я**вльшуся Тебѣ́ во Иорда́нѣ, Спа́се, и крещшуся Тебѣ́ отъ Предте́чи, Христе́, возлю́бленный Сы́нъ свидѣ́ствованъ бы́лъ еси́, тѣ́мже и Собе́знача́лень Отцу́ яви́лся еси́, Ду́хъ же

Святы́й на Тя́ схожда́ше, Имже и просвѣтившеся, вопіемъ: славу Бо́гу, Су́щему въ Троицѣ.]

**По 2-й стихоло́гii сѣда́лень, гла́сь 4. Подобенъ:**

**Вознесѣйся.**

**М**ужественнымъ помысломъ прешедше мученіе, чуднии страсотерпцы, сквозѣ рѣчную глубину проидоште и преминуште ко спасенія широтѣ, наслѣдіе приимше небесное Царство, въ немже творите о насъ божественныя мольбы, добропобѣднии мученицы. **[Дважды.]**

**Сла́ва, и ны́нѣ, праздни́ка, гла́сь 5. Подобенъ:**

**Собезначальное Слово.**

[Иорданскими струями обложся, Иже свѣтомъ преславно одѣваяйся, въ нихже Адамово естество обновилъ еси, сокрушающееся злымъ преслушаніемъ, Слове Божій. Тѣмже Тя́ восхваляемъ и святое Твое вси славословимъ явленіе.]

**По по́ліелеi сѣда́лень, гла́сь 8:**

**В**едоми бысте связаны отъ враговъ и въ темницу затворени, вѣрою соблюдаеми, непобѣдими пребысте и, отрѣшившеся тѣлесь, святіи, божественнымъ желаніемъ явѣ облекостеся. Тѣмже, яко свѣтила, просіаєте въ мірѣ, вѣрныя просвѣщающе Ду́ха благода́тію. Страстоносцы мученицы, моли́те Христа́ Бо́га согрѣшеній прощѣніе даровати чтущимъ любовію святу́ю па́мьять ва́шу. **[Дважды.]**

**Сла́ва, и ны́нѣ, праздни́ка, гла́сь 4. [Подобенъ: Удиви́ся**

**Юсифѣ.**

**П**риидите, увидимъ, вѣрнии, гдѣ крестіся Христо́съ, да послѣдуимъ прочее ко Иордану рѣцѣ, ко гла́су вопіющаго въ пустыни, и увидимъ тамо Содѣтеля Адамова, дланію рабскою

рукополагаема за благоутробіе неизреченное, и къ Немѹ велегласно возопіимъ: пришель еси и явился еси во Іорданѣ освятити воды.]

**Степенна, 1-й антифонъ 4-го гласа. Прокимень, гласъ 4:**  
**Возваша праведни, и Господь услыша ихъ,\*** [и отъ всѣхъ скорбей ихъ избави ихъ]. **Стихъ:** Многи скорби праведнымъ, и отъ всѣхъ ихъ избавитъ я Господь. **Всякое дыханіе... Евангеліе [Матѳея, зачало 36].**

### **По 50-мъ псалмѣ стихира, гласъ 2:**

Приидите, возрадуемся Господеви въ память страсотерпецъ, о празднолюбцы! Приидите, воспоймъ ясно, восхваляюще страдальцы Христовы, лживая мудрованія и вражескую лѣсть отвергшия и правую вѣру Христову посредѣ судища небоязненно проповѣдавшия. Тѣмже, о всеблаженни и многострадальни, непрестанно молитесь о душахъ нашихъ.

**Канонъ праздника со ирмосомъ на 6 и мучениковъ на 8:**  
**[Канонъ праздника, гласъ 2.**

### **Пѣснь 1.**

**Ирмосъ:** *Глубины открылъ естъ дно и сушею Своя влечетъ, въ ней покрывъ противныя, крѣпкій во браняхъ Господь, яко прославися.*

**Адама** истлѣвшаго обновляетъ струями Іорданскими и зміевъ главы гнѣздящихся сокрушаетъ Царь вѣковъ, Господь, яко прославися.

**Огнемъ** Божества Невещественнымъ въ плоть вещественну одѣввся, Іорданскою облагается водою воплощійся отъ Дѣвы Господь, яко прославися.

Скверну омываяй челоуѣковъ, симъ очищся во Иорданѣ, имже, восхотѣвъ, уподобися, еже бѣ пребывъ, сущія во тмѣ просвѣщаяй Господь, яко прослауися.]

## **Канонъ святымъ мученикомъ, [гласъ 1].**

### **Пѣснь 1.**

**Ирмосъ:** *Твоя побѣдительная десница богоугодно въ крѣпости прослауися: та бо, Безсмертне, яко всемогущая противныя сотре, израильтяномъ путь глубины новосодѣлавшая.*

Безпечальную жизнь наслѣдовасте, святїи мученицы Христоуы, седьдесяте со тремї, и радости духовныя исполняеми присно, всяку печаль, молюся, отженїте отъ души моея, яко да, радуяся, слаулю священное ваше страданїе.

Новоявленныя звѣзды бысте, мученицы Христоуы, предводи́мыя достослаунымъ, крѣпкимъ во ученїи и терпѣнїи, священнымъ Исидоромъ, тѣмже молимъ вы: тму грѣховную отженїте отъ сердець нашихъ, добропобѣднїи мученицы Христоуы.

Разжженнїи Божественными угльми Святаго Духа, страдалицы, доблестнымъ страданїемъ просїясте, святїи, и стрѣлы сокрушисте вся древняго змїя, льстиваго борца.

**Троїчень:** Троїце Единосушная, Отче, Слове и Душе Святыи, Тя вѣрно слауимъ, яко Творца всѣхъ, и Тебѣ вопїемъ благочестно: Троїце Святая, спасї ны, Боже, молитвами Твоихъ страдалецъ.

**Богородичень:** Дверь Божественныя славы — Ты еси, Пречїстая Госпоже, покаянїя ми двери отверзи, Владычице, отъ врагъ адовыхъ исхитї, молюся, смиренную мою душу, яко да по долгу слаулю Тя, теплую Заступницу мою.

### ПѢСНЬ 3.

**[Ирмось:** *Крѣпость даѣи царѣмъ нашимъ Господь, и рогъ помазанныхъ Своихъ возносяи, отъ Дѣвы раждается, грядетъ же ко Крещенію. Тому, вѣрнии, возопіемъ: нѣсть святъ, яко Богъ нашъ.*

**Неплодная** дрѣвле и безчадная лють, днесь веселися, Христова Церковь: водою бо и Духомъ сынове тебѣ родишася, вѣрою зывающе: нѣсть святъ, якоже Богъ нашъ.

**Вѣлимъ** гласомъ въ пустыни вопіетъ Предтеча: Христу уготовайте пути и стези Богу нашему правы содѣлайте, вѣрою зывающе: нѣсть святъ, якоже Богъ нашъ.

### **Инь:]**

**Ирмось:** *Едине, вѣдый чловѣческаго существа немошь и мѣлостивно въ не воображся, препояши мя съ высоты сілою, еже вопіи Тебѣ, Святѣй, одушевлѣнный храмѣ неизречѣнныя славы Твоя, Чловѣколюбче.*

**Двизаше** всю злобу льстивый врагъ, со святыми боряся, и побѣждашеся отъ нихъ, зря тѣхъ непобѣждаемыхъ, понеже Божія сила помогаше имъ, тѣмже Божественныя свѣтлости явишася общницы, богоблаженни.

**Зломудренный** бискупъ ваъ восхотѣ, святѣи, отторгнути отъ правыя вѣры и ко своему лжемудрованію присоединити и опрѣсночному служенію, вы же противустае ему, святѣи, яко добліи воіни, и сілою Христовою побѣду взясте нань.

**Троичень:** **Свѣтъ** Отець, **Свѣтъ** Сынъ, **Свѣтъ** Духъ Святѣй Утѣшительный, яко отъ Солнца бо Единаго Троїца сіяючи, Божественно озаряетъ и соблюдаетъ души наша святыхъ мученикъ мольбами.

**Богородичень:** Дѣво Мати Пречистая, яже Бога воплощшая, гласы пріими вопіющихъ Тиі всегда и насъ избави отъ различныхъ искушеній вражіихъ.

**[Кондакъ праздника, гласъ 4:**

Явился еси днесь вселеннѣй, и свѣтъ Твой, Господи, знаменася на насъ, въ разумѣ поющихъ Тя: пришель еси и явился еси, Свѣтъ Неприступный.

**Икосъ:**

Галилеи язычестѣй, Завулонстѣй странѣ и Нефѣалимстѣй земли, якоже рече пророкъ, Свѣтъ великъ возсія, Христось. Омраченнымъ свѣтла явися Заря, изъ Виѣлеема облистаяющая, паче же изъ Маріи Господь, всеі вселеннѣй возсіяваетъ лучи Солнце правды. Тѣмже, иже отъ Адама назіи, приидите вси, облечѣмся въ Него, да согрѣемся, покрываетъ бо нагія и просвѣщаетъ тѣмныя. Пришелъ еси и явился еси, Свѣтъ Неприступный.]

**Сѣдалень, гласъ 5:**

Сіяетъ днесь память страсотѣрпцевъ Твоихъ, Господи, седмидесятъ со двѣма и со священноначальникомъ ихъ Исидоромъ, яко звѣзды, просіявшихъ и мракъ заблужденія прогнавшихъ отъ вѣрныхъ Божіимъ пособіемъ; имутъ бо дерзновеніе ко Господу, Емуже и предстоятъ, молящеся о всѣхъ насъ, честная страданія ихъ вѣрно почитающихъ. **[Дважды.]**

**Слава, и нынѣ, праздника, [гласъ 4:**

Струи освятилъ еси Иорданскія, державу сокрушилъ еси грѣховную, Христѣ Боже нашъ, приклонилъ еси длани Себе

Предтечевѣ и спаслъ еси отъ лести чловѣческой родъ. Тѣмже Тя молимъ: спаси души наша.]

#### **ПѢСНЬ 4.**

**[Ирмосъ:** *Услышахъ, Господи, гласъ Твой, егѡже реклъ еси, гласъ вопиющаго въ пустыни, яко возгремѣлъ еси надъ водами многими, Твоему свидѣтельствуяи Сыну, весь бывъ сошедшаго Духа, возопи: Ты еси Христосъ, Божія мудрость и сила.*

**Очищаемо** солнце кто видѣ, — проповѣдникъ вопіетъ, — пресвѣтлое естествомъ? Да Тебѣ водами, сіяніе Славы, Отца образъ Присносущнаго, омыю и, сѣно сый, Огню прикоснуся Твоего Божества? Ты бо еси Христосъ, Божія мудрость и сила.

**Яви** Божественное, еже имѣ, благоговѣніе Моисей, прилучився Тебѣ, яко бо изъ купины Тя, возгласивша, разумѣ, абие отврати лице. Азъ же како Тя увижу ясно? Или како руку положу на Тя? Ты бо еси Христосъ, Божія мудрость и сила.

**Душевное** совершая мудре и словомъ почтенный, бездушныхъ стыждуся. Аще бо крещу Тя, клеветна ми естъ огнемъ дымящаяся гора, побѣгшее же море на двоѣ и Иорданъ сей, возвративыйся: Ты бо еси Христосъ, Божія мудрость и сила.

#### **Инь:]**

**Ирмосъ:** *Гору Тя, благодатию Божією приостыненную, прозорливыми Аввакумъ усмотривъ очима, изъ Тебѣ изыти Израилеву провозглашаше Святому, во спасеніе наше и обновленіе.*

**Страдальцы** святіи, седмьдесятѣ со двѣма, и, яко голубь чистый, Исидоре, учителю истинныя вѣры Христовы, васъ поколебати не возможе вселукавый отъ божественнаго стоянія, но самъ падѣся злый.

**С**трасотерпцы сла́вни и страда́льче до́блй, Иси́доре блаже́нный, приве́дый Го́сподеви ли́къ му́чениковъ, вы́ бо уме́ты вмѣ́нисте вся́ кра́сная ми́ра, да обря́щете Христа́ Бо́га на́шего — и́стинную Кра́соту и некра́домое Бога́тство.

**Тро́ичень:** Тро́ицу Ли́цы, Еди́ницу о́бразомъ, благоче́стно сла́вимъ, Бо́га и́стинна, Его́же пою́тъ а́нгельская и арха́нгельская чи́нонача́лія, я́ко тва́ри Влады́ку, и чело́вѣцы, вѣ́рно покланя́ющесе при́сно.

**Богоро́дичень:** Воплоща́ется отъ чи́стыхъ крове́й Твои́хъ Госпо́дь, пока́яніе чту́щимъ Тя́ подава́я, Всепѣ́тая, Твои́мъ благо́имъ хода́тайствомъ, я́ко Благоутро́бенъ и Еди́нь Чело́вѣколюбе́ць.

### **Пѣ́снь 5.**

**[Ирмо́сь:** *Иису́сь, живота́ Нача́льникъ, разрѣши́ти осужде́ніе грядѣ́тъ Ада́ма перво́зданнаго, очище́ній же я́ко Бо́гъ не тре́буя, па́дшаго очища́етъ во Иорда́нѣ, въ не́мже вражду́ уби́въ, преиму́щъ вся́къ у́мъ ми́ръ да́руетъ.*

**С**ше́дшимся безъ числа́ лю́демъ отъ Ио́анна крестити́ся, са́мъ посредѣ́ ихъ ста́. Провозгласи́ же предстоя́щимъ: кто́ показа́, непокоривіи, гнѣ́ва ва́мъ уклонити́ся, хотя́щаго бы́ти? Плоды́ досто́йны Христу́ сотвори́те: Предста́й бо ны́нѣ ми́ръ да́руетъ.

**Д**ѣ́латель и Зижди́тель, посредѣ́ стоя́й, я́ко Еди́нь всѣ́хъ сердца́ испыты́етъ, чи́стительную же лопа́ту руко́ю прие́мъ, всемі́рное гумно́ всему́дрѣ́ разлуча́етъ, непло́діе паля́, благопло́днымъ вѣ́чный живо́тъ да́руетъ.

**Инь:]**

**Ирмось:** *Просвѣтѣвый сїяніемъ пришествія Твоего, Христѣ, и освѣтѣвый Крестомъ Твоимъ міра концы, сердца просвѣти свѣтомъ Твоего богоразумія, православно поющихъ Тя.*

**Водъ** духовныхъ исполнишася триѣ и сѣдмьдесятъ, въ воду ввержени бывше, святїи, за всѣхъ Живота — Христа Царя, и Божественнымъ мановѣніемъ изнесѣна быша честная тѣлеса ихъ на сушу, и прѣлести изсушиша мутныя потоки силою Божіею, и вѣрныхъ сердца напоиша.

**Вельми** подвигшеся рѣвностію, божественни мученицы, и о Христѣ укрѣпляеми, враговъ Православныя вѣры посрамите и законъ латїнскїй и лживая ученїя попрасте, святїи, и ни во чтоже вмѣните. Мученикъ молѣніемъ, Слове Божїй, великихъ мукъ избави насъ, вседушевно святая мученїя ихъ ублажающихъ.

**Троїчень:** Преначальное и Присносущное Единое Божество славословяще, поклонимся въ Триехъ Лицѣхъ естествомъ Нераздѣльному и славою Равночестному, якоже божественни мученицы проповѣдаша.

**Богородичень:** Дѣво, въ женахъ Благословенная, Твоя милости подаждь людемъ Твоимъ, страстотѣрцевъ Христовыхъ молѣніемъ, Милостиваго бо явилася еси Мати.

## **Пѣснь 6.**

[**Ирмось:** *Гласъ Словесѣ, свѣтїильникъ Свѣта, денница Солнца, Предтеча въ пустыни, — покайтесь, — всѣмъ вопіетъ людемъ, — и предочїстїтеся: се бо предстоитъ Христосъ, отъ тли міръ избавляяй.*

**Рождся** нетлѣнно отъ Бога и Отца, отъ Дѣвы кромѣ скверны воплощается Христосъ, Емуже ремень, яже отъ насъ Слова

сочта́нiя, разрѣшiти неудобѣ, учить Предте́ча, земнородныя  
отъ лѣсти избавляя.

**Огнѣмъ** крестить конечнымъ Хри́сто́сь противныя, а не Бо́га  
му́дрствующи́хъ Его́, Ду́хомъ же обновляетъ водою́ благода́ти  
разумливыя Божества́ Его́, отъ прегрѣше́нiй избавляя.

**Инь:]**

**Ирмо́сь:** *Обыде насъ послѣдняя бѣздна, нѣсть избавляяй,  
вмѣни́хомся, яко овцы заколе́нiя, спаси́ люди Твоя́, Бо́же нашъ, Ты́  
бо крѣ́пость немо́щствующи́хъ и исправле́нiе.*

**Что́** намъ мно́гая словеса́, я́же глаго́леши, би́скупе, неправыя  
вѣры побо́рниче, и обѣща́емая, я́же предлага́еши? —  
священны́й Иси́доръ со дружи́ною своею́ глаго́лаше къ  
мучи́телю, — сiя́ вся́ намъ же́лчи горча́йша, но твори́, е́же  
хо́щеши, о суету́дренне.

**Ва́сь,** честни́и страда́льцы Хри́сто́вы, Ду́хъ Святы́й укрѣпи́, и  
всели́ся въ ва́сь бога́тно, и терпѣ́нiе дарова́ вамъ проти́ву  
жестокосе́рдыхъ враго́въ, Его́же си́лою мно́гiя томле́нiя и му́ки  
претерпѣ́сте, святiи, отъ неправовѣ́рныхъ. Тѣ́мже и Хри́сто́сь  
ва́сь вѣнча́ десни́цею Своєю́ бога́тою, за Него́же и пострада́сте.

**Трои́чень:** Оте́ць, Сы́нъ и Ду́хъ Пра́вый, Три́поста́сная  
Еди́нице и Нераздѣ́лимая Трои́це, поми́луй покланя́ющiяся  
Боже́ственнѣй держа́вѣ Твое́й.

**Богоро́дичень:** Витѣ́йствующая уста́ не возмо́гутъ повѣ́дати  
Твое́, Отрокови́це, таи́нство: Несказаннаго бо ражда́еши и на  
руку́ Своєю́ но́сиши руко́ю Содержа́щаго вся́ческа́я.

**Конда́къ, гла́сь 4:**

**Му́ченикъ** Хри́сто́выхъ ли́къ пѣ́сньми почти́мъ,  
пострада́вшихъ крѣ́пко Хри́сто́вы ра́ди вѣры и́стинныя и

вражію гордыню до конца низложившихъ. Озарившеса бо благодатию Несозданныя Троицы, славни, со священномученикомъ Исидоромъ пострадавшии, яко звѣзды, сіяете во всемъ мѣрѣ, и нынѣ молитесь Христу непрестанно, и насъ защищайте отъ враждебныхъ языкъ нашествія, неусыпнии моли́твенницы о душа́хъ нашихъ.

### **Икосъ:**

**Премудрый** Зиждитель, Владыка и Господь винограда мысленнаго, якоже пресвятыи усты въ притчи винограда глаголетъ, во единонадесятый часъ дѣлавшимъ даруетъ богатую мзду; и нынѣ, дѣлы извѣстивъ въ притчи крыемое, священноучителя Исидора и иже съ нимъ полкъ страдалецъ седьмдесятъ со двѣма́ показа́ свѣтлы мученики и воины презрядны. Преданія бо и законы латинскія поправше, добліи, и ненавистниковъ правыя вѣры ужасивше крѣпкимъ противленіемъ своимъ и терпѣніемъ, подобни бысте первымъ страдальцемъ, святіи мученицы. Тѣмже Христось васъ вѣнча́ нетлѣнными вѣнцы́ въ кровѣхъ небесныхъ, идѣже мученичестіи лица веселятса. Вы же защищайте насъ отъ враждебныхъ языкъ нашествія, неусыпнии моли́твенницы о душа́хъ нашихъ.

### **Пѣснь 7.**

**[Ирмосъ:** Юноши благочестивыя, пещи огненный приобщи́вшіяся, шумящъ дѣхъ росный невредимы сохрани́ и Божія ангела снизхождѣніе. Тѣмже, въ пламени ороша́еми, благодарственно воспѣваху: препѣтый отецъ Господи и Боже, благословѣнъ еси́.

**Якоже** на небеси́, съ трѣпетомъ и чудомъ предстояху во Иорданѣ силы ангельскія, смотряюще толика Божія схождѣнія:

яко Держай превышнихъ водъ составъ, въ водахъ Плотносець стояше, Богъ отцевъ нашихъ.

**Облакъ** древле и море Божественнаго проображаху Крещенія чудо, въ нихже древни крестяшася, исходяще законни людіе. Море же бе образъ воды, и облакъ — Духа. Имиже совершаеми, — благословенъ еси, — зовемъ, — Господи Боже, во вѣки.

**Вси** вѣрнии, въ Немже совершение пріяхомъ, богословяще немолчно со ангелы, прославимъ Отца, и Сына, и Духа Святаго: се бо — Троица, Впостаьми Единосуцная, Единъ же Богъ. Емуже поемъ: благословенъ еси, Господи Боже, во вѣки.

**Инь:]**

**Ирмосъ:** *Тебѣ, умную, Богородице, пещь, разсмотримъ, вѣрнии, якоже бо отроки спасе три Превозносимый, миръ обнові, во чревь Твоемъ всецѣль, хвальный отцевъ Богъ и препрославленъ.*

**Истинни** мученицы, истиннаго Христа Бога нашего страдальцы, трие и седьдесятъ, зываху къ мучителемъ своимъ: біение, и огнь, и иныя муки готови есмы сладцѣ подъяти за правую вѣру Христову. И радостно пояху: аще Богъ по насъ, никтоже на ны, благословенъ Богъ отецъ нашихъ.

**Зубы** скрежещуще убійственни людіе и, яко звѣрие, восхитивше богоявленники, въ темницу вметаху и водамъ предаяху, мученицы же радостно пояху: благословенъ Богъ отецъ нашихъ.

**Троичень:** Прославимъ Троицу Нераздѣльную, воспоймъ Едино Божество, со Отцемъ Слово и Духа Всесвятаго.

**Богородичень:** *Благословенъ еси, Боже, Иже во чре́вѣ Дѣви́чи всели́выйся и спасы́и чело́вѣка, препѣ́тый и превозноси́мый во вѣ́ки.*

### **Пѣ́снь 8.**

**[Ирмо́сь:** *Та́йну пресла́вную вавило́нская показа́ пе́щь, источи́вшая ро́су, я́ко струя́ми имя́ше невести́тельный Огнь воспри́яти Иорда́нъ и объя́ти плоти́ю креща́ема Жижди́теля, Его́же благослова́тъ лю́дие и превозно́сятъ во вся́ вѣ́ки.*

**Отложи́** страхъ ве́сь, — **Изба́витель** Предте́чи рече́, — **Мнѣ́** же повини́ся, я́ко Благо́му, **Мнѣ́** присту́пи, се́ бо естество́мъ бы́хъ, **Моимъ** повелѣ́ниемъ покори́ся и крести́ **Мя**, соше́дшаго, **Его́же** благослова́тъ лю́дие и превозно́сятъ во вся́ вѣ́ки.

**Глаго́лы** якоже услы́ша Крестите́ль Влады́чни, съ трѣ́петомъ длань простира́еть, **оба́че** же, руко́ю косну́вся верху́ Жижди́теля своего́, **Креще́мому** вопія́ше: **освати́ мя**, **Ты́** бо еси́ **Бо́гъ мой**, **Его́же** благослова́тъ лю́дие и превозно́сятъ во вся́ вѣ́ки.

**Тро́ицы** явле́ние во Иорда́нѣ бы́сть, са́мое бо Пребоже́ственное Естество́, **Оте́цъ**, возгласи́: **Се́й** креща́емый — **Сы́нъ** возлю́бленный **Мой**, **Духъ** же при́иде къ **Подобному**, **Его́же** благослова́тъ лю́дие и превозно́сятъ во вся́ вѣ́ки.

### **Инь:]**

**Ирмо́сь:** *Въ* пе́щи о́троцы *Изра́илевы*, *якоже* въ *горни́ль*, *добро́тою* *благоче́стія* *чистѣ́е* *зла́та* *блеща́хуся*, *глаго́люще:* *благослови́те*, *вся́* *дѣла́* *Господня*, *Го́спода*, *пойте* *и* *превозноси́те* *во* *вся́* *вѣ́ки.*

**Х**валящеся язвами Христо́выми, къ вѣчнымъ востекосте обителемъ, священномучениче Исидоре и иже съ тобою соборъ мученической, во одежды одѣяни убѣленныя, и свѣтло Царѣви силъ предстоите, съ мученики взывающе: благословите, вся дѣла Господня, Господа.

**С**тратотѣрпцы, мученицы Христо́вы, седьдесяте со тремі, пламень вражескія злобы попрасте Божіимъ пособіемъ, безчеловѣчныхъ мучителей посрамите и вѣнцы нетлѣнными отъ Христа вѣнчаестеся, непобѣдиміи, воспѣвающе: благословите, вся дѣла Господня, Господа.

**Я**ко земля жаждущая, мученицы блаженніи, пріясте ученія отъ медоточнаго языка Исидора священнаго и вложиште въ души своя, якоже нѣкую сладость Божественную, и отъ сего принесосте Подвигоположнику Христу класъ сторицествующъ, поюще: благословите, вся дѣла Господня, Господа.

**Троичень:** Да поѣтся Трисвятый, Отець и Сынъ и Духъ Святый, Нераздѣльная Единица, Единое Божество, держащее дланію всю тварь во вся вѣки и насъ назирающее милостію Своею богатою, поющихъ: благословите, вся дѣла Господня, Господа.

**Богородичень:** Изъ Тебе Богъ возсія, Всепѣтая Дѣво, и богоразуміемъ просвѣти омраченныя люди, и насъ отъ истлѣнія къ жизни небеснѣй возведе, поющихъ: благословите, вся дѣла Господня, Господа.

### **Пѣснь 9.**

**[Ирмось:** Недоумѣетъ всякъ языкъ благохвалити по достоянію, изумвѣаетъ же умъ и премірный пѣти Тя, Богородице:

*оба́че Благо́я су́щи, вѣру приими́, ибо́ любовьъ вѣси́ Божѣственную на́шу, Ты́ бо христіа́нъ еси́ Предста́тельница, Тя́ велича́емъ.*

**Дави́де,** прииди́ Ду́хомъ къ просвѣщеннымъ, — ны́нѣ приступи́те, — пой́ къ Бо́гу, — вѣрою, — глаго́ля, — просвѣтитесь! Се́й ни́щій воззва́ Ада́мъ въ падѣніи, ибо́ Того́ услы́ша Госпо́дь, прише́дъ, струя́ми Иорда́нскими тлѣннаго же обнови́.

**Иса́ія,** — измы́йтеся, очи́ститесь — глаго́летъ, — лука́вствія предъ Го́сподемъ оста́вите. Жа́ждущи, на во́ду живу́ иди́те: кропи́тъ бо водо́ю, обновля́я, Христо́сь приступа́ющія къ Нему́ вѣрою и къ животу́ нестарѣемому крещаетъ Ду́хомъ.

**Соблюда́емъ** благода́тію, вѣрніи, и печатію. Яко́ бо губи́теля, бѣжа́ша пра́га евре́и, дре́вле окрова́влена, та́ко и на́мъ исходное́ Божѣственное се́ пакибытія́ ба́ня бу́детъ. Отсю́ду и Тро́ицы у́зримъ Свѣ́тъ Незаходи́мый.

**Инь:]**

**Ирмо́сь:** *Образъ чи́стаго рождества́ Твоего́ огнепали́мая купина́ пока́зъ неопальная; и ны́нѣ на на́съ напа́стей свирѣпнѣющую угаси́ти, мо́лимся, пе́щь, да Тя́, Богороди́це, непреста́нно велича́емъ.*

**Пло́ть** свою́ преда́вше ра́намъ и го́рькимъ темни́цамъ за Всевы́шняго Царя́ и Го́спода, неуязвленну спасли́ есте́ ду́шу, страсотер́пцы Госпо́дни блаже́ннии со тремі́ се́дмьдесяте, и Божѣственныя сла́вы прича́стницы бы́ти сподобистесь, всечестніи мученицы.

**Невече́рняго Свѣ́та** — Христа́ — звѣзды на земли́ со пресвѣ́тлымъ Иси́доромъ священнымъ яви́стесь, блаже́ннии, и всѣ́мъ челове́комъ озаря́ете ду́ши, призыва́ющимъ ва́сь съ вѣрою и почита́ющимъ святу́ю па́мьятъ ва́шу.

**Па́мять** свѣтоза́рную ва́шу и честну́ю почита́юще и ра́дующеся ду́хомъ, мо́лимся: блаже́нный Иси́доре, до́блій учи́телю, съ пострада́вшими съ тобо́ю му́ченики, вся правосла́вныя лю́ди сохра́няйте невреди́мы, и Импера́тора на́шего ски́петръ и во́и утверди́те, непобѣди́мии му́ченицы Христо́вы.

**Тро́ицень:** Трѣпоста́сное Естество́ и Нераздѣ́льную сла́ву, въ Божествѣ́ Единѣ́мъ пое́мую непреста́нно на небеси́ и на земли́, Тро́ицу Неразлу́чную просла́вимъ, съ Сы́номъ Отцу́ и Ду́ху покланя́ющеся благоче́стно, да изба́вимся муче́нія о́гненнаго предста́тельствомъ страстоте́рпцевъ, проповѣ́давшихъ Святу́ю Тро́ицу.

**Богоро́дичень:** Благослове́нную Мари́ю, Госпожу́, и Бо́жію Ма́терь, и Дѣ́ву, прииди́те, вси́ вѣ́рнии, любо́вию непреста́нно восхва́лимъ, Ея́же ра́ди обрѣ́тохомъ вѣ́чное ра́дованіе.

**Свѣти́лень. Подобе́нь:** Плото́ю усну́въ.

Свѣ́ту Невече́рнему — Христу́ — предстоя́ще съ ли́ки му́ченическими, блаже́ннии страстоте́рпцы Госпо́дни, се́дмьдесятъ со тре́ми, воспѣ́вающихъ ва́съ спаса́йте моли́твами свои́ми, святѣ́и. **[Два́жды.]**

**[Сла́ва, и ны́нѣ,] богоро́дичень:**

Незаходи́мага Свѣ́та носи́ла еси́, Приснодѣ́во Ма́ти Мари́е, просвѣ́щающаго съдя́щихъ во тмѣ́ невѣ́дѣнія, Сы́на Твоего́ и Бо́га на́шего.

**На хвали́техъ стихи́ры [на 4], гла́сь 8. Подобе́нь: О,**  
пресла́внаго чудесе́!

Му́ченицы Христо́вы прехва́льнии, гони́телей стремле́нія и ну́ждную сме́рть ни во что́же вмѣ́нисте, и, благоде́рзостно

ополчившися, мужемудренно къ бореніемъ побѣдоносною славою одѣястися, и причтостися всѣмъ праведнымъ, съ нимиже васъ, всегда хваляще, ублажаемъ. **[Дважды.]**

**М**ученицы Христовы преблаженнии, на водное потопление сами себе предасте, и землю телесы вашими освятисте, и воздухъ просветисте восхождениемъ къ небесемъ; нынѣ же живете на небесѣхъ во свѣтѣ невечернемъ, о насъ всегда молящися, боговидцы.

**М**ученицы Христовы непобѣдимии, мукъ разжжение росю Божественныя благодати безъ вреда проидосте, и на водѣ покойнѣ жити сподобистесь, вѣнцы побѣды приемше; тѣмъ, радующеся днесь, празднуемъ святую вашу память, Христа славяще.

### **Слава, гласъ 8:**

**В**оинствовавши Христу, яже на земли красная остависте, и крестъ на рамена вземше, мукъ ради многоплетенныхъ Тому послѣдовали есте, и предъ мучители многими не отвергостесь Его. Ангелы вѣнцы побѣдными главы ваша увязоша, дерзновеннии душею, свѣтло въ чертогъ небесный внидоште. Тѣмже, дерзновение имуще ко Спасу всѣхъ, молитесь о душахъ нашихъ.

### **И нынѣ праздника, [гласъ 2:**

**Д**несь Христосъ на Иорданъ прииде креститися, днесь Иоаннъ касается верху Владычню. Силы небесныя ужасошася, преславное видяще таинство. Море видѣ и побѣже, Иорданъ, видѣвъ, возвратися. Мы же, просвѣщшися, вопіемъ: слава явившемуся Богу, и на земли видѣнному, и просвѣтившему мѣрѣ.]

**Славословіе великое. Ектеніи и отпусть. Чась первый.**



**НА ЛИТУРГИИ, Блаженна праздника, пѣснь 4-я и святымъ пѣснь 6-я. Прокимень, [праздника, гласъ 4: Благословенъ грядый во имя Господне, Богъ Господь и явился намъ. Стихъ: Исповѣдайтесь Господеви, яко Благъ, яко въ вѣкъ милость Его. И святымъ, гласъ тойже: Святымъ, иже суть на земли Его, удиви Господь вся хотѣнія Своя въ нихъ. Апостоль, святымъ, къ Римляномъ, зачало 99. Аллилуя, праздника, гласъ 4: Принесите Господеви сынове Божіи, принесите Господеви сыны овни. Стихъ: Гласъ Господень на водахъ, Богъ славы возгремѣ, Господь на водахъ многихъ. И святымъ, гласъ тойже:] Возваша праведніи, и Господь услыша ихъ, [и отъ всѣхъ скорбей ихъ избави ихъ. Евангеліе Луки, зачало 106. Причастень праздника: Явился благодать Божія спасительная всѣмъ челобкомъ. И святымъ: Радуйтесь праведніи о Господѣ, правымъ подобаеть похвала].**  
**Источникъ: Служба святому священномученику Исидору и иже съ нимъ 72-мъ мученикомъ, во Юрьевѣ, градѣ Ливонстѣмъ, за Православіе пострадавшимъ во 1472 году. — Первымъ тисненіемъ. — СПб.: Синодальная Типографія, 1897. — С. 3-26.**